

SAMOA

Faatulagaina o Aiaiga

**VAEGA 1
FAATOMUAGA**

1. Igoa puupuu ma le amataga
2. Faamatalaina o uiga o upu
3. Sini Autu

**VAEGA 2
LALA SOOUPU O
FAAMATALAGA FAAPITOA
TAU FANUA MA ASETA**

4. Faavaeina o le Lala Sooupu o Faamatalaga Faapitoa Tau Fanua ma Aseta
5. Faaululuga Tau Pulega
6. Tofiaina o isi tagata ofisa ma tagata faigaluega
7. Ia galulue tagata ofisa ma tagata faigaluega i lalo o le faatonuga a le Faaululuga Tau Vaega
8. Malosiaga ma galuega tauave a le Lala Sooupu
9. Malosiaga o le Minisita
10. Galuega tauave a le Ofisa Sili o Pulega

11. Galuega tauave a le Faaululuga Tau Vaega

**VAEGA 3
KOMITI FAATINO
O IGOA FAA-FAAFANUA
O NOFOAGA**

12. O le Komiti Faatino o Igoa faa-Faafanua o Nofoaga
13. Sini Autu a le Komiti Faatino
14. Galuega tauave a le Komiti Faatino
15. Malosiaga o le Komiti Faatino
16. Fonotaga a le Komiti Faatino
17. Totogi o sui auai o le Komiti Faatino
18. Taiala faavae

**VAEGA 4
AIAIGA ESEESE**

19. Tuuina atu o Malosiaga
 20. Tuusaunoaga mai noataga
 21. Tulafono Faatonutonu
-

2010, Nu. 27

O SE TULAFONO e faavae ai se **Lala Sooupu o Faamatalaga Faapitoa Tau Fanua ma Aseta** ina ia maua ai avanoa talafeagai i faamaumauga o faamatalaga faapitoa tau fanua ma aseta, ina ia uunaia ai le faaaogāina o ia faamatalaga faapitoa e lagolago ai fuafuaga, pulega ma puipuiga lelei atoatoa o punaoa faalenatura mo Samoa, ma mo faamoemoega e fesootai i ai. *[19 Oketopa 2010]*

UA FAIA e le Fono Aoao Faitulafono a Samoa i totonu o le Palemene ua potopoto e faapea:

**VAEGA 1
FAATOMUAGA**

1. Igoa puupuu ma le amataga-(1) E mafai ona taua leni Tulafono o le Tulafono o le Lala Sooupu o Faamatalaga Faapitoa Tau Fanua ma Aseta 2010.

(2) O leni Tulafono e amata faamamaluina atoa po o sona vaega, i le aso po o aso e filifilia e le Minisita.

2. Faamatalaina o uiga o upu - I totonu o leni Tulafono, ae vagana ai ua manaomia e le mataupu se isi faiga e ese ai:

“Lala Sooupu” o lona uiga o le Lala Sooupu o Faamatalaga Faapitoa Tau Fanua ma Aseta ua faavaeina i lalo o le fuaiupu 4;

“fuaina o fanua i ata faamauina o fuataga” o lona uiga o le fuafuaga ma le faamatalaga o le tulaga lautele o faamatalaga faapitoa tau fanua ma aseta e aofia ai tuaoi o lo o i ai aia i lalo o se faiga e nofoia ai fanua;

“faatulagaga o faamatalaga o le fuaina o fanua i ata faamauina o fuataga” o lona uiga o le faatulagaga o faamatalaga o le fuaina o fanua i ata faamauina o fuataga talafeagai ona tuufaatasia ai se faamaumauga o le fuaina o fanua i totonu o le tusi resitala;

- “tusi resitala o le faamauina o fanua” o lona uiga o faamatalaga uma o le fuaina o fanua i ata faamauina o fuataga ua umia e po o mo lala sooupu a le Malo;
- “Ofisa Sili o Pulega” o lona uiga o le Ofisa Sili o Pulega o le Matagaluega e fitoitonu ma fanua;
- “faatulagaga o faamatalaga autu o fanua ma aseta” o lona uiga o faamatalaga, po o faatulagaga o faamatalaga, ia e talafeagai e tuuina atu ai le taiala faavae mo le fuafuaina o le faaaogāina i se tulaga aupito talafeagai o le tele o faamatalaga tau faafanua o lo o faaaogāina i faiga faakomepiuta (GIS) e talafeagai i le taunuuga o faaiuga a se aofaiga o lala sooupu;
- “Faauluuluga Tau Vaega” o lona uiga o le faauluuluga tau pulega a le Ofisa ua tofia i lalo o le fuaiupu 5;
- “faiga o le fuaina o fanua i fuataga o foliga vaaia o le laueleele” o lona uiga o se faiga lea e mafai ai ona fuafua tulaga i luga o le laueleele e ala i faasinomaga i se faiga faamatematika lea e faamatalaina ai foliga o le laueleele;
- “igoa faa-faafanua” o lona uiga o le igoa o so o se taulaga, nuu, nofoaga nofoia, itumalo, vaega, nofoaga tuaoi, uiga vaaia, meafaitino, auala po o nofoaga faaagaga i luga o le laueleele ma pulega faaetulafono o le gataifale o Samoa;
- “Komiti Faatino o Igoa faa-Faafanua o Nofoaga” po o le “Komiti Faatino” o lona uiga o le Komiti Faatino ua faavaeina i lalo o le fuaiupu 12;
- “GIS” o lona uiga o le Faiga e Teuina ai Faamatalaga Tau Faafanua lea e i se faiga faakomepiuta e mafai ona faatulagaina ai, teuina, tuufaatasia ma faailoa atu faamatalaga faapitoa tau fanua ma aseta;
- “faamatalaga” o lona uiga o faamatalaga ua maea ona tagofia, tuufaatasia po o ua faavasegaina i ni ituaiga ina ia faamalieina ai se faamoemoe aogā. E mafai ona tuuina atu i se faiga faafuainumera lolomi, ata i faiga faa-kalafi po o fuainumera;
- “Minisita” o lona uiga o le Minisita e fitoitonu ma fanua;

“Matagaluega” o lona uiga o le Matagaluega e fitoitonu ma fanua;

“ata” o lona uiga o le tusiaina faa-kalafi o le tasi (1) po o le sili atu o le fuaina o fanua i ata faamauina o fuataga;

“faamatalaga faapitoa tau fanua ma aseta” o lona uiga o faamatalaga ia e aofia ai le tele, nofoaga po o tulaga o lo o tu ai so o se nofoaga, mea o tutupu po o suiga matuia i luga o le laueleele. O se faaupuga lautele e faaaogā e tuufaatasia ai faamatalaga o fanua ma faamaumauga tau faafanua; ma

“fuafanua” e i ai lona uiga tutusa e pei ona i ai i le Tulafono o le Fuaina o Fanua 2010.

3. Sini Autu - O sini autu o lenei Tulafono ua taua e faapea:

(a) e lagolago ai i le faaaogāina atoatoa ma lelei ma le fefaasoaiga o faamatalaga faapitoa tau fanua ma aseta; ma

(b) ia tuuina atu ma tausia le faataatiaga o le laufanua o le atunuu i faafanua, siata o le gataifale ma isi ata faatonutonu mamao e manaomia mo le pulega gafataulimaina o fanua, sami ma isi punaoa faalenatura; ma

(c) ia tuuina atu ma tausia faiga o le fuaina o fanua i fuataga o foliga vaaia o le laueleele ma le taiala faavae o faasinomaga o faamatalaga faapitoa tau fanua ma aseta mo Samoa ma ia fesootai atu lenei taiala faavae i fetaulaiga o fesootaiga faava o malo; ma

(d) ia tuufaatasia ma tausia le nofoaga autu mo faamatalaga faapitoa tau fanua ma aseta o Samoa i se faiga e mafai ai ona tuuina atu se fuafuaga faavae mo le tuufaatasiga o faamatalaga faapitoa tau fanua ma aseta; ma

(e) ia uunaia ai le faaaogāina lautele ma le fefaasoaiga o faamatalaga faapitoa tau fanua ma aseta ma le faatuputupulaia o le alamanuia o faamatalaga faapitoa tau fanua ma aseta i Samoa; ma

- (f) puipuia aia a le Malo i mataupu uma e uiga i meatotino tau le atamai ma pule tau fatuga e uiga i le tuufaatasia, tuuina atu ma le umia o nofoaga autu o faamatalaga faapitoa tau fanua ma aseta ma meafaitino o lo o tuufaatasia ma lomia faasalalau ai faamatalaga faapitoa tau fanua ma aseta.

VAEGA 2
LALA SOOUPU O FAAMATALAGA
FAAPITOA TAU FANUA MA ASETA

4. Faavaeina o le Lala Sooupu o Faamatalaga Faapitoa Tau Fanua ma Aseta-(1) Ua faavaeina se Vaega o le Matagaluega ma e tataua ona taua o le Lala Sooupu o Faamatalaga Faapitoa Tau Fanua ma Aseta.

(2) E aofia i le Lala Sooupu:

- (a) le Ofisa Sili o Pulega; ma
- (b) le Faauluuluga Tau Vaega ua tofia i lalo o le fuaiupu 5; ma
- (c) nisi lava tagata ofisa ma tagata faigaluega o lo o umia tofi i totonu o le Lala Sooupu e tusa ai ma le fuaiupu 7; ma
- (d) nisi lava tagata ofisa po o tagata faigaluega ua tofia mai isi vaega o le Matagaluega e pei ona talafeagai ai; ma
- (e) le Komiti Faatino o Igoa faa-Faafanua o Nofoaga.

5. Faauluuluga Tau Pulega-(1) O le Faauluuluga Tau Pulega e tali atu i le Ofisa Sili o Pulega mo galuega tauave a le Lala Sooupu.

(2) O se Ofisa Sili Lagolago o Pulega, ua tofia e tusa ai ma le Tulafono o Galuega a le Malo 2004, e tataua ona avea ma faauluuluga tau pulega o le Lala Sooupu.

6. Tofiaina o isi tagata ofisa ma tagata faigaluega - E mafai ona tofia tagata faigaluega a le Malo pe a talafeagai ai e avea ma tagata ofisa ma tagata faigaluega a le Lala Sooupu e faataunuuna lelei galuega tauave a le lala sooupu.

7. Ia galulue tagata ofisa ma tagata faigaluega i lalo o le faatonuga a le Faauluuluga Tau Vaega - E tatau i tagata ofisa ma tagata faigaluega uma o le Lala Sooupu ona galulue i lalo o le faatonuga a le Faauluuluga Tau Vaega i le faatinoga o a latou galuega tauave, malosiaga ma tiute tauave faaetulafono.

8. Malosiaga ma galuega tauave a le Lala Sooupu-(1) I le noatia ma le fai fuafua i lenei Tulafono, e tatau i le Pulega ona i ai malosiaga, aia tatau ma pule faataga uma e talafeagai po o le faavavevave ai ona faatino ana galuega tauave.

(2) E aunoa ma le faatapulaaina o le tulaga lautele o le faafuaiupu (1), e tatau i le Lala Sooupu ona i ai malosiaga ma galuega tauave:

- (a) e lagolago ai le faaaogāina atoatoa ma lelei ma le fefaasoaiga o faamatalaga faapitoa tau fanua ma aseta; ma
- (b) ia faia faapitoa, le faia tuusao ma le faatagaina o ma le atinae o faafanua ma siata o Samoa; ma
- (c) ia tuuina atu ma tausia le faataatiaga o le laufanua o le atunuu i faafanua, siata o le gataifale ma isi ata faatonutonu mamao e manaomia mo le pulea gafataulimaina o fanua, sami ma isi punaoa faalenatura; ma
- (d) ia tuuina atu ma tausia le faiga o le fuaina o fanua i fuataga o foliga vaaia o le laueleele ma le taiala faavae o faasinomaga o faamatalaga faapitoa tau fanua ma aseta mo Samoa ma ia fesootai atu lenei taiala faavae i fetaulaiga o fesootaiga faava o malo; ma
- (e) ia tuufaatasia ma tausia nofoaga autu ma faamatalaga faapitoa tau fanua ma aseta mo Samoa i se faiga e mafai ai ona tuuina atu ai se fuafuaga mo le tuufaatasia o faamatalaga faapitoa tau fanua ma aseta; ma
- (f) ia umia faapitoa meafaitino uma ma faamatalaga faapitoa tau fanua ma aseta e aofia ai so o se suesuega, lipoti ma isi meafaitino ma aia tatau o meatotino uma tau le atamai e tulai mai i ia meatotino, faamatalaga, suesuega ma lipoti;

- (g) ia uunaia le faaaogāina lautele ma le fefaasoaiga o faamatalaga faapitoa tau fanua ma aseta ma le faatuputupulaia o le alamanuia o faamatalaga faapitoa tau fanua ma aseta i Samoa; ma
- (h) ia sainia so o se konekarate, feagaiga, feagaiga e noatia ai po o maliega o so o se ituaiga po o le a lava mo le faamoemoe o lenei Tulafono; ma
- (i) ia tuuina atu so o se laisene mo le faaaogāina o faamatalaga faapitoa tau fanua ma aseta po o so o se isi lava meafaitino po o aia tatau lea e umia e le Lala Sooupu; ma
- (j) ia puipuia aia a le Malo i mataupu uma e uiga i meatotino tau le atamai ma pule tau fatuga e uiga i le tuufaatasia, tuuina atu ma le umia o nofoaga autu o faamatalaga faapitoa tau fanua ma aseta ma meafaitino o lo o tuufaatasia ma lomia faasalalau ai faamatalaga faapitoa tau fanua ma aseta.

(3) O malosiaga ua faaee atu e lenei fuaiupu e tatau ona faaopoopo atu ae lē aveesea mai ai so o se isi malosiaga ua faaee atu i le Pulega e lenei Tulafono po o so o se isi lava tulafono.

9. Malosiaga o le Minisita - E tatau ona i ai i le Minisita nisi malosiaga e pei ona talafeagai ai e mafai ai ona faatino lelei galuega tauave ma faalauteleina sini autu o lenei Tulafono.

10. Galuega tauave a le Ofisa Sili o Pulega - O galuega tauave a le Ofisa Sili o Pulega o:

- (a) le faatinoina o aiaiga o lenei Tulafono ina ia ausia ai sini autu e aofia ai le -
 - (i) fautuaina o faiga faavae i le Kapeneta e pei o le faamautinoa o lo o i ai se fuafuaga tau faiga faavae e faafoe lelei ma atoatoa mo le fefaasoaiga o faamatalaga faapitoa tau fanua ma aseta; ma

(ii) faailoagofie, faasoa atu ma mataitu lala sooupu e vaavaaia punaoa tau faamatalaga faapitoa tau fanua ma aseta o le atunuu; ma

(iii) faamautinoa o lo o talafeagai le tulaga o Samoa i le tulaga faaitulagi ma faava o malo i mataupu o faamatalaga faapitoa tau fanua ma aseta; ma

(iv) uunaia suiga fou mo le faaleleia o faiga faatekonolosi ma aoaoga; ma

(b) ia faamaonia ituaiga laisene uma, maliega po o isi faatulagaga mo le faatauina atu o faamatalaga faapitoa tau fanua ma aseta; ma

(c) saunia le polokalame faaletausaga ma lipoti faaletausaga a le Lala Sooupu; ma

(d) ia uunaia fuafuaga faataatitia ma mautinoa le maopopo o galuega e tusa ai o le tuuina atu, faaaogāina ma le gafataulimaina ona faaaogā punaoa o faamatalaga faapitoa tau fanua ma aseta a Samoa; ma

(e) ia tofia se komiti, vaega galulue e aofia ai vaega o tagata o faaaogāina, ina ia faufautua i faiga faavae, mataupu faaletulafono ma mataupu e faasino i ai; ma

(f) ia tuuina atu faafanua, tausia ma faasalalauina faamatalaga autu mo faamatalaga faapitoa tau fanua ma aseta ma pulega faaletulafono o le alititai o Samoa; ma

(g) faataga le faia o faafanua o le atunuu; ma

(h) faavae ma tausia le fetaulaiga o le fuaina o fanua i fuataga o foliga vaaia o le laueleele o Samoa; ma

(i) vaavaaia suesuega, faamaoniga ma le faamauina o ata uma ma faamatalaga o le fuaina o fanua i ata faamauina o fuataga mo vaevaega ma faamatalaga o fanua uma; ma

(j) faavae ma tausia le faasino upu o faamaumauga o igoa faa-faafanua o nofoaga i Samoa; ma

- (k) tuuina atu fautuaga i le Malo e uiga i itu uma o le tuufaatasia, faaaogāina ma le puleaina o faamatalaga faapitoa tau fanua ma aseta o Samoa; ma
- (l) tuuina atu lagolago faaletulafono i le Komiti Faatino o Igoa faa-Faafanua o Nofoga.

11. Galuega tauave a le Faauluuluga Tau Vaega - O galuega tauave ma tiute a le Faauluuluga Tau Vaega o le:

- (a) fesoasoani i le Minisita ma le Ofisa Sili o Pulega ina ia ausia sini autu o lenei Tulafono; ma
- (b) ia faia gaoioiga o le fuaina o fanua mo le fuafuaina o tuaoi o fanua; ma
- (c) faatino ma faafoe suesuega ma faamaonia taualumaga e pei ona talafeagai ai -
 - (i) e faamautinoa ai le tausia o le tulaga atoatoa, ma tulaga faataatitia o le fuaina o fanua mo pule o fanua, lisi po o faamoemoega o le faamauina o fanua i lalo o tulafono uma e faasino i le faamauina o aia i fanua; ma
 - (ii) ia faafaigofie ai le tuufaatasiga o fuagafanua i le faiga e fuaina ai fanua; ma
 - (iii) faamautinoa le faamaoni o faamaumauga talafeagai uma; ma
- (d) logoina le Minisita ma le Ofisa Sili o Pulega i taimi uma e uiga i faamatalaga lata mai o mataupu tau fanua; ma
- (e) ia fautuaina le Minisita ma le Ofisa Sili o Pulega i le auala e mafai ai ona faaleleia le aoina mai ma le auiliiliga o faamatalaga faapitoa tau fanua ma aseta; ma
- (f) faamautinoa e faapea o lo o lelei ona faatino galuega tauave a le Matagaluega i lalo o lenei Tulafono; ma
- (g) faatino nisi lava galuega tauave ma tiute e pei ona mafai ona faaee atu i le Faauluuluga Tau Vaega e le Minisita po o le Ofisa Sili o Pulega.

VAEGA 3
KOMITI FAATINO O IGOA
FAA-FAAFANUA O NOFOAGA

12. O le Komiti Faatino o Igoa faa-Faafanua o Nofoga-(1) Ua faavaeina le Komiti Faatino o Igoa faa-Faafanua o Nofoga e avea o se vaega o le Lala Sooupu.

(2) O lo o aofia i le Komiti Faatino:

(a) le Minisita, o ia e tatau ona avea ma Taitaifono;

(b) le Ofisa Sili o Pulega, o ia e tatau ona avea ma sui taitaifono; ma

(c) o isi sui e toafa (4) e ao ona tofia e le Kapeneta mai lea taimi i lea taimi i luga o le fautuaga a le Minisita.

(3) O sui auai o le Komiti Faatino ua tofia i lalo o le faafuaitupu (2)(c) e:

(a) umia le tofi mai le aso na tofia ai; ma

(b) umia le tofi mo le tolu (3) tausaga po o se vaitaimi e itititi ifo; ma

(c) e agavaa mo le toe tofiaina.

(4) E ui lava e faapea ua muta le vaitaimi o le tofiga o se sui auai o le Komiti Faatino, e tatau ona faaauau pea le umia o le tofi e se sui auai vagana ua tofia se tagata e soloai ane i ai, ae vagana ai ua tuua le tofi e le sui auai e tusa ai ma aiaiga o lenei Tulafono.

(5) E lē tatau ona aafia malosiaga o le Komiti Faatino i so o se avanoa e tulai mai i po o ua faaletonu le tofiaina o ona sui auai.

(6) Afai o sē ua maliu, faamavae po o ua aveesea mai le tofi:

(a) e tatau ona faatumu le avanoa ua tulai mai i le faiga lea na uluai faia ai le tofiga i le tofi; ma

(b) o le tagata ua tofia e faatumuina le avanoa e tatau ona tofia mo le vaitaimi o totoe lea na tofia ai le tagata na muamua atu.

(7) E mafai ona toe totoigiina tupe a sui auai o le Komiti Faatino mo femalagaaiga ma isi tupe faaalu e pei ona faamaonia e le Faauluuluga Tau Vaega e tusa ai ma faiga faavae ma tulafono talafeagai a le Matagaluega o Tupe.

13. Sini autu a le Komiti Faatino - E i ai sini autu a le Komiti Faatino ua taua e faapea:

- (a) ia aveesea le tulaga lē mautinoa ma lē mautonu i igoa faa-faafanua i Samoa;
- (b) ia mautinoa o lo o talafeagai le aloaia o le tofi tuufaasolo ma aganuu a Samoa i le filifiliga o igoa faa-faafanua;
- (c) ia tuuina atu taiala faavae tau faalapotopotoga ma pulega lea e faafaigofie ai ona faatino faatalatalanoaga lautele i nuu ma afioaga e uiga i mataupu o lo o aofia i totonu o lenei Tulafono.

14. Galuega tauave a le Komiti Faatino - O galuega tauave a le Komiti Faatino ua taua e faapea:

- (a) e iloilo ma fuafua pe e faamaonia igoa faa-faafanua i Samoa; ma
- (b) suia se igoa faa-faafanua ua faamauina; ma
- (c) faamatala auiliili, toe faamatala auiliili, suia po o le teuteu ma faamaonia tuaoi uma tau pulega; ma
- (d) ia faaaogāina tulaga faataatitia ma faaaogā tulafono faafoe mo le faamaoniga o igoa faa-faafanua; ma
- (e) ia atiae ma uunaia taiala faavae mo le faatulagaga o igoa faa-faafanua o; ma
- (f) ia tuufaatasi ma tausia se faamaumauga o igoa faa-faafanua uma faatasi ai ma se faamaumauga o lo latou foliga, sipelaina, uiga, mea na afua mai ai ma lona talaaga; ma
- (g) ia lomina faasalalau se faasilasilaga o igoa faa-faafanua; ma
- (h) ia faia suesuega ma fautuaga e uiga i se mataupu ua tuuina atu e le Minisita i le Komiti Faatino.

15. Malosiaga o le Komiti Faatino - E tataua ona i ai i le Komiti Faatino malosiaga e pei ona talafeagai ai e mafai ai ona faatino lelei ana galuega tauave ma le faalauteleina o sini autu o lenei Tulafono.

16. Fonotaga a le Komiti Faatino-(1) O fonotaga a le Komiti Faatino e faia i taimi ma nofoaga e pei ona filifilia e le Taitaifono.

(2) O le aofai o sui auai e tatau ona auai ona mafai lea ona faia se fonotaga a le Komiti Faatino e toatolu (3).

(3) O se mataupu e fesiligia i se fonotaga a le Komiti Faatino e faia lona faaiuga e ala i se fuainumera fulisia o palota a sui o lo o auai i le fonotaga.

(4) E lē agavaa ona auai pe palota se sui auai o le Komiti Faatino po o le auai i se isi faiga e ese ai i so o se vaega o se fonotaga a le Komiti Faatino, pe afai o lo o iloiloina se mataupu e faasino i le faamauina o le sui, faamalolo lē tumau, po o se amioga lē pulea.

(5) E tatau i le Taitaifono ona faia sana palota e fai ai le filifiliga, ma i le tulaga pe afai e tutusa palota, e tatau foi ona i ai sana palota faaopoopo e saili ai se faaiuga.

(6) E mafai e le Komiti Faatino ona faatonutonu ana taualumaga i se faiga e manatu o ia e talafeagai e tusa ai ma lenei Tulafono.

(7) E tatau i se tagata ofisa o le Lala Sooupu ona faatino tiute tauave o le Failautusi o le Komiti Faatino, ia e tatau ona aofia ai mea ua taua e faapea:

- (a) tuuina atu faasilasilaga o fonotaga a le Komiti Faatino;
- (b) tausia faamaumauga o mataupu o fonotaga uma a le Komiti Faatino;
- (c) faamauina faaiuga uma ua faia e le Komiti Faatino;
- (d) talia ma faagasolo talosaga e tuuina atu i le Komiti Faatino; ma
- (e) mataituina galuega tusitusia a le Komiti Faatino.

17. Totogi o sui auai o le Komiti Faatino - E agavaa sui auai toatasi uma e maua se totogifuapauina e pei ona faamaonia e le Kapeneta mo le auai i fonotaga a le Komiti Faatino.

18. Taiala faavae - E mafai e le Komiti Faatino o Igoa faa-Faafanua o Nofoaga ona faia taiala ia e tatau ona ogatasi ma lenei Tulafono, e tusa ai o:

- (a) pepa faatumu po o isi pepa aloaia e ao ona faaaogā mo faamoemoega o lenei Tulafono; ma
- (b) taualumaga e ao ona mulimulitaia ina ia ogatasi ma manaoga i lalo o lenei Tulafono; ma
- (c) le faiga ma le auala e teuina ai faamaumauga ia e ao ona teuina e le Komiti Faatino i lalo o lenei Tulafono; ma
- (d) faatonuina nofoaga po o ituaiga nofoaga e le o faaaogāina i ai aiaiga o lenei Tulafono; ma
- (e) faatulaga mataupu uma ia e faataga ona faatonuina e lenei Tulafono mo le faamamaluina o aiaiga o le Tulafono.

VAEGA 4 **AIAIGA ESEESE**

19. Tuuina atu o malosiaga-(1) E mafai e le Minisita, ina ia tusa ai ma lenei Tulafono, ona tuuina atu i se tagata ofisa po o tagata faigaluega o le Lala Sooupu so o se galuega tauave ma malosiaga po o galuega tauave ma malosiaga uma ia ua faaee atu i le Minisita e lenei Tulafono.

(2) E mafai e le Ofisa Sili o Pulega, ina ia tusa ai ma lenei Tulafono ona tuuina atu i se tagata ofisa po o tagata faigaluega o le Lala Sooupu so o se galuega tauave po o galuega tauave uma ma malosiaga ia ua faaee atu i le Ofisa Sili o Pulega e lenei Tulafono.

(3) E mafai e le Faauluuluga Tau Vaega ona tuuina atu i se tagata ofisa po o se tagata faigaluega o le Lala Sooupu so o se galuega tauave po o galuega tauave uma ma malosiaga ia ua faaee atu i le Faauluuluga Tau Vaega e lenei Tulafono.

(4) O le tuuina atu o se malosiaga i lalo o lenei Tulafono e ao ona faia i se faiga tusitusia, ma:

- (a) o so o se tagata o ia lea e tuuina atu se galuega tauave po o malosiaga i lalo o lenei Tulafono e mafai ona ia faatinoina lea galuega tauave po o malosiaga; ma

- (b) e mafai e so o se tagata o ia lea e tuuina atu se malosiaga po o se galuega tauave i lalo o lenei Tulafono, ona faalēaogāina ma lona loto i ai le tuuina atu o malosiaga ma tiute tauave; ma
- (c) o so o se tuuina atu o malosiaga ma tiute tauave ua faia i lalo o lenei fuaiupu e se tagata o ia lea ua muta lona umia o le tofi, e faaauau pea lona aloaia e faapei ai sa tuuina atu malosiaga ma galuega tauave e le sui o lea tagata ua soloai atu i le tofi, seia vagana ua faalēaogāina le tuuina atu o ia malosiaga ma tiute tauave.

20. Tuusaunoaga mai noataga - I le faatinoga o o latou malosiaga, tiute ma galuega tauave i lalo o lenei Tulafono, e lē tataua ona noatia le Minisita, Ofisa Sili o Pulega, o le Faauluuluga Tau Vaega po o so o se isi lava tagata o lo o galue i lalo o le pule faataga a le Minisita, Ofisa Sili o Pulega po o le Faauluuluga Tau Vaega, i se tulaga patino mo so o se mea ua faaleagaina po o mo so o se gaoioiga, gaoioiga ua lē faia po o se faaletonu ua faia i le agaga lelei.

21. Tulafono Faatonutonu-(1) E mafai e Le Ao o le Malo, i le faia i le ma e faatasi ai ma le fautuaga a le Kapeneta, mai lea taimi i lea taimi ona faia ia tulafono faatonutonu e pei ona mafai ona talafeagai ai mo le faafoega, pulea, atinae ma le puipui lelei o faamatalaga faapitoa tau fanua ma aseta ma igoa faa-faanua.

(2) E aunoa ma le faatapulaaina o le tulaga lautele o le faafuaiupu (1), e mafai ona fatonuina e tulafono faatonutonu faasalaga mo le solia o tulafono faatonutonu ua faia i lalo o lenei Tulafono, e aveva o sala tupe e lē silia le 50 iunite tau faasalaga.

**O le Tulafono o le Lala Sooupu o Faamatalaga Faapitoa
Tau Fanua ma Aseta 2010 o lo o faafoeina e le Matagaluega
o Punaoa Faalenatura ma le Siosiomaga.**

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono.**